

*Divinitas Christi probatur ab ejus cultu.*

**Q**uando sinus patrios linquens & dulcia regna  
Filius ipse Dei, mortalem ostendere vultum  
Vellet, & ad miseros æquali accederet ore;  
Sedibus æthereis non cessit, ut Astra caduca,  
Quæ lapsa in terram, amissâ jam sorte priori,  
In faciem demum terrestrem & inutile viscus  
Degenerant, subito dum purior evolat ignis.  
Majestas illi semper divina, nec ulla  
Larva creaturas potuit celare tonantem.  
Dum chorus Angelicus celebraret nomen Iesu,  
Æthera voce suâ complet, quam læta per orbem  
Excipiens longè jactat vehementiùs Echo.  
Adventum Domini hinc agnovit conscius Orbis,  
Obstupuit Delphis Vates, & mutus Apollo  
Arbitrio cessit Christi: ipsa haud machina rerum  
Surda Creatorem renuit, quem læta fatetur.  
Hinc super Oceanum Jesus vestigia sacra  
Dum figit, pronus Numen Neptunus adorat,  
Et Nymphæ tremulos volvunt ad littora fluctus;  
Obsequium præstat ventus, nec murmure iniquo  
Obstrepat imperio, quin mites transsit in auras.

Non fert æternum Numen commercia cultûs;  
*Divisum imperium cum Jove nullus habet.*  
Non colimus templum sed præsens Numen; Iesus  
Si sit mortalis, non mea thura feret.  
Sic olim Herôas coluit delira vetustas,  
Et Roma indigetes credidit esse Deos.  
Non factus, sed natus erat Deus ille, character  
Clarus, & æqualis Patris imago sui.

*ERGO*, cujus habet communia sacra, Paternam  
Naturam pariter Filius ipse gerit.

*Baptismus non est Ritus indifferens.*

**M**ittite cædendos octavâ luce puellus  
Sabbatici Verpæ! cœlum meliore lavacro  
Jam petimus, sacro Baptismi fonte piandi.  
In teneros sævire juvat! sempérne cruorem  
Ambiet infantum divini Numinis ira?  
Sic nimium dubiæ nascentia stamina vitæ  
Et tenerum violatis opus, dum stat pia Mater  
Tota madens lacrymis, frustra miserata puelli;  
Unus tum dederat sævus duo vulnera culter,  
Sanguis huic, illi manat per lumina fletus,  
Baptismi vel tum præstans præfagia nostri.  
At non huic insuetus honos, non hæc nova venit  
Gloria; quin illum vestri coluere parentes:  
Hæc nôrunt pridem sacra, cum gens Patria quondam  
Missa per ingentem traxere piamina nubem.  
Siquos cultores reliquis de gentibus unquam  
Ascivit Judæa fides, aspergine tantum  
Lustrali & puris voluit mersarier undis,  
Nec prius Esseni excipiunt, quam fonte piarunt  
*Assecta* sordem, & vitæ peccata prioris.  
Sic primum affulsit Solymis præfaga Dei lux  
*Baptistes*, sed cum demissus ab æthere summo  
Messias promissus adest, nova fœdera sancit,  
Moliturque novos homines atque altera jura.  
Hic primus prælibat aquas, ea pignora quondam  
Et vitæ potioris & olim signa salutis.  
Ripa triumphalem vix tum compescere Rivum  
Dum tumidas volvit Jordanes grandior undas.  
Sic cum pura dies & clari gloria cœli  
Nec Jove nimboso periit neque nubibus ullis,  
Inter aquas vidisse licet sua lumina Solem  
Spargentem cœlique eadem simulacra superni.  
Arridet sub aquis ingens nec tum minor æther  
Expanditque sinus diffuso lumine vastos.  
Defunctus tandem tam magno munere Christus  
Discipulis eadem, (dum Regna paterna capeffit)  
Discedens mandata dedit, quâ terra pateret,  
Lustrarent undis & Trino Nomine gentes.